

# Canalisar vers la muntogna subsidis per sanaziuns energeticas

DA CLAUDIA CADRUVI / ANR

■ **Martin Candinas (pcd/GR) rimna suttascripziuns per ina nova moziun en il cussegl naziunal. Sia finamira è ch'ina part dals subsidis per sanaziuns energeticas gïajan en las regiuns da muntogna.** Quest'emna inoltrescha il cusseglier naziunal sia intervenziun. L'idea ha Candinas sviluppà ensemen cun la Gruppa svizra per regiuns da muntogna (SAB). La moziun pretennda: Ina terza dals subsidis per sanaziuns energeticas da bajetgs duai vegnir duvrada per abitaziuns secundaras turisticas.

## Radund 100 milliuns l'onn

L'avantatg fiss che la confederaziun na stuess betg impunder dapli daners. Ils meds finanzials per sanaziuns energeticas hajan ins dauzà da 200 sin 300 milliuns francs l'onn, di Candinas a l'anr. «Sch'ins po duvrar ina terza da quests meds per sanar abitaziuns secundaras van ils daners en lieus nua ch'ins senta il pli fitg las consequenzas da l'iniziativa cunter abitaziuns secundaras.»

Bleras abitaziuns da vacanzas sajan vegnidas bajegiadas en ils onns sessanta u settanta per part cun stgaudament electric u dad ieli. Ils possessurs na sajan savens betg motivads da sanar las abitaziuns ed ils indrizs damai ch'els passentian mo paucas emnas en las abitaziuns da vacanzas. Cun dar ina contribuziun per ina sanaziun energetica possian ins motivar ils possessurs d'investar daners en las abitaziuns da vacanzas.

«Uschia dat ins la pussaivladad da stegnaire las regiuns turisticas a moda e maniera prudenta ed ecologica», di Candinas.

## Stgaudadas l'entir enviern

Las abitaziuns turisticas fetschian or in gronda cumpart da tuts bajetgs en Svizra, stat scrit en la moziun. Las abitaziuns da vacanzas sajan savens isoladas mo malamain. Per evitar donns da scheltira vegnian ellas stgaudadas l'entir



Il moziunar  
Martin Candinas.

KEYSTONE

enviern. Las subvenziuns per sanaziuns energeticas han per mira da sbassar las emissiuns da CO<sub>2</sub>.

En tsherts cas saja quai perfin inditgà da far giu la chasa da vacanzas e da bajegiar si da nov. Novas energias regenerablas – sco pumpas termicas u indrizs solars – vegnian utilizadas suletamain tar bajetgs novs.

L'iniziativa cunter abitaziuns secundaras limiteschia la pussaivladad da bajegiar novas abitaziuns da vacanzas. Ord

vista energetica stoppian ins perquai focussar sin la sanaziun dals chasaments. Qua tras po vegnir prestà ina contribuziun a la reduziun d'emissiuns da CO<sub>2</sub> ch'ins na duess betg negligir. Plinavant possian ins dar a fit pli tgunsch abitaziuns sanadas a moda energetica, tge che saja d'interess general per il turissem, stat scrit en la moziun.

Parlamentaris da tuttas partidas grondas hajan suttascriet sia moziun, di Candinas a l'anr.

## Candinas candidescha sco suprastant da la SAB

La fin d'avust sa radunan ils delegads da la Gruppa svizra per las regiuns da muntogna (SAB) a Mustér. La radunanza generala vegn ad eleger in nov president, damai che l'anterior cusseglier dals chantuns *Theo Maissen* re-

metta ses uffizi sunter 15 onns. Era cusseglier naziunal *Hansjörg Hasler* sortia da la suprastanza, hai num tar la SAB. Sco nov represchentant dal Grischun vegnia a candidar cusseglier naziunal *Martin Candinas*.